



Marcus Lenz (san.) igl president partent digl cumegn da vaschigns da Vaz retscheva en regal da Maurin Malär, igl president communal da Vaz.



La nova cumischung da gestiun peglia cunaschientscha dalals cefras digl rendachint. (da san.) Manfred Fiegl, Adelina Rischatsch e Giovanni Olgiati.

FOTOS GION NUTEGN STGIER

Dus milliuns francs daple antradas da taglia

En chint annual 2021 positiv pigl cumegn da Vaz. Igl chint sera cun en gudogn da 5,7 milliuns francs. Igl architect Marcel Liesch cumplettescha la cumischung da biagier. Venavant duessan las sedutas digl parlamaint neir protocolladas e betg neir ramplazzadas da registraziuns digl tung.

GION NUTEGN STGIER/FMR

Igl cunsegl communal da Vaz è s'inscuro a Zorten per la sia 4. seduta digl onn 2022. All'antschatta da chella ò Maurin Malär, igl mastral digl cumegn da Vaz angraztgea a Marcus Lenz, igl president partent digl cumegn da vaschigns da Vaz per sies grond angaschamaint. Chel cumegn seia adegna sto en bung partenari pigl cumegn politic, ò menziuno Maurin Malär, er sch'ins seia magari betg adegna digl madem meini. Marcus Lenz sez, el ò catto angal bungs plets per la collaboraziun exemplarica cu gl cumegn politic da Vaz, cun l'administraziun communal e cun tot las otras autoritads.

Igl om digl rom è uriund da Brinzauls

Tar egna dallas davosas sedutas digl parlamaint ò chel eligia las persungas tgi appartignan alla cumischung da biager digl cumegn da Vaz. Alla testa da chella stat cun Thomas Parpan, igl om tgi magna igl de-

partamaint da construcziun ed ambiaint aint igl pi grond cumegn dalla regiun Alvara. Alla cumischung fon er part Livio Corsini, Sascha Ginesta, Christoph Messmer e Reto Müller. Scu persunga cun vusch consultativa per la cumischung da biagier on igls omens e las donnas digl parlamaint digl cumegn da Vaz eligia igl architect Marcel Liesch. El è carschia se a Brinzauls, ò stibgia architettura ed ò fundo igl 1993 ena interpresa singula. Or da chella è sada igl 2017 la Marcel Liesch architect SA. Da preschaint occupescha igl biro d'architettura a Coira diesch persungas. Tranter oter è neida construeida la tgesa communal da Domat tenor igls plans da Macel Liesch. Igl madem vala er per la scola da Seewis, igl luvratori digl Uffez da construcziun bassa a Surava ed igl center da scolaziun gòt a Maiavilla.

Antradas da 51,5 milliuns francs

Piglia cunaschientscha ed approvo ò igl cunsegl communal er igl rendachint an-

nual 2021 digl cumegn da Vaz. Tar antradas da 51,5 milliuns francs sera chel cun en gudogn da 5,7 milliuns francs. Budgeto era en gudogn da 2,4 milliuns francs ed alla fe gn finala è igl gudogn per 3,2 milliuns pi ot tgi tenor preventiv. La raschung tgi igl chint annual digl davos onn da gestiun è per en po migler tgi spigla èn tranter oter er las pi otas antradas da taglia. Chellas schean tar 22,4 milliuns francs ed èn per dus milliuns francs pi otas tgi tenor las cefras digl preventiv. Igl chint d'investiziun chel conferma tgi igl cumegn da Vaz ò investo igl 2021 cun 9,6 milliuns francs 1,5 milliuns damanc tgi budgeto. Approvo on igls preschaints er igl chint annual dalla tgesa d'attempo Parc tgi sera cun antradas e sorteidas da 3,3 milliuns francs cun en deficit da 189 000 francs.

I dova en protocol scretg

Per daple material da discussiun ò procuro igl tractandum revisiun parziala

digl urden da fatschenta pigl cumegn da Vaz. Da vart dalla cumischung da gestiun è neida la proposta tgi aint igl avigneir fiss pi adatto da ramplazzar igls protocols an scretg dallas sedutas digl cunsegl communal, antras registraziuns da tung. Oters cumegns fettschan gio chegl ed er aint igl Cunsegl grond seia chegl igl cass, è nia detg. Igl è sa musso tgi igls cunsigliers communal e las cunsiglieras communalas eran cun pacas excepziuns ansomma betg fi e flomma per far chella midada. Alla fe gn èn da 15 commembers digl parlamaint angal tschintg stos per far chella midada. Chegl vot deir tgi er aint igl futur vign protocollo chegl tgi vign decida e detg aint igl cunsegl communal da Vaz.

Tempo 30 sen territori da cumegn

Inlotro è nia alla supranza en postulat sottascetg dad otg persungas tgi ap-

partignan agl parlamaint. Igl sotsignias lessan saveir dalla supranza schi fiss betg adatto da redutgier igl tempo cunzont per las veias da quartier e las veias lateralas sen 30. Ultra da chegl duess la supranza delucidar tge elaboraziuns tgi seian an chella tgoscha actualas, tge propostas tg'ins fettscha e tge projects tgi vignan proximamaintg realisos per redutgier igl tempo sen territori communal a Vaz. I dova urgentamaintg soluziuns, chegl testifitgescha er tgi 70 persungas vegian sottascetg l'ideia digl iniziants digl postulat. Sot varia ò Maurin Malär, igl mastral detg tgi proximamaintg decida digl cumegn da Zollikon sch'el vigna a vender igl taragn a Sanaspans ad en interessent da Coira. Igl cumegn da Zollikon sez, vegia nign interess ple da far diever digl taragn e da biagier scu previa en hotel a Sanaspans. Lò ò igl cumegn turitges gio siva da bles onns ena tgesa per camps da vacanzas.

Onor pigl president

Carl Frischknecht è igl migler tiradour grischun digl onn 2021. El suonda a Lars Färber. Tar la categoria juniors gudogna chel premi Enrica Caluori, ella tgi davainta successoura d'Annina Tomaschett.

GION NUTEGN STGIER/FMR

Nomino pigl tetel d'onor tiradour grischun digl onn 2021 era tar l'elita cun Norbert Caviezel (Coira) igl rêtg-tiradour dalla Festa da teir federala a Lucerna dalla categoria arma 57/03. Cun Carl Frischknecht (Tumegl) era er igl president dall'Uniun da teir cantunala nomino, el tg'è er sto igl 2021 campiuon svizzer cun la gruppa da Giuvaulta tar l'occurrentza da gruppas naziunala. Elmar Fallet (Müstair), egn digl miglers tiradours da pistola dalla Svizra, er el era nomino per chel tetel, en tetel tgi igl Jauer ò gio gudagnea quatter gedas an sia carriera fenomenala. Tigls juniors èn stos nominos cun Enrica Caluori (Razegn) e Chris Wolf (Trun) dus talents tgi teiran cun l'arma sen las distanzas da 50 e 10 meters. Cumpetto igl trio nomino ò Tim Wolf (Conters) igl gioven tiradour da pistola. Per l'amprema geda ò igl public er pudia sa participar alla tschern digl tiradour grischun digl onn. Igl criteris eran igls sundonts per ansomma neir nomino: 20% la prestaziun sportiva, 20% igl angaschamaint pigl teir, 20% la decisiun dalla giuria e 40% igl resultat digl public. Nov è er tgi sch'en tiradour u ena tiradoura davainta tiradour grischun digl onn vign el ed ella betg ple an elecziun.



Carl Frischknecht, igl tiradour grischun digl onn 2021.

FOTO GION NUTEGN STGIER

Fitg angaschea

Igl nov tiradour grischun digl onn è ainten la scena da teir ena persunga fitg ancunaschainta. Carl Frischknecht è siva da passa 25 onns fitg colliia cu gl sport da teir. El è sez en tiradour da vaglia ed en om tgi s'angascha fitg ferm pigl sport da teir e chegl sen camp regional, cantunala e naziunala. Digl 2002 anfignen igl 2010 è el sto commember dalla supranza dalla Federaziun grischuna digl sport da teir. Avant diesch onns ò el presidia igl comite d'organiziun dalla Festa da teir cantunala 2012 aint igl Grischun Central. Sies angaschamaint pigl sport da teir è nia ancuro igl 2017 cun davantar Carl Frischknecht president dall'uniun tgi reunescha igls vers 5000 tiradours digl Grischun. Scu tiradour da gruppa, pe-ro er scu singul tiradour ò igl om da Tumegl grond success cun esser egn digl miglers tiradours da noss cantun. Carl Frischknecht è digl reminent er igl magnagestiuon dalla Festa da teir federala 2026 tg'ò li aint igl Grischun cun Coira scu center. Enrica Caluori ella dastga siva da sonda er sa numnar tiradoura grischuna digl onn tigls juniors. Ella è siva da ples onns commembra digl cader cantunala digl team da 50 e 10 meters arma da sport.